

Awor mester yuda cuida Wilhelmina Park

ORANJESTAD (AAN): Ayera den Wilhelmina Park na ocasion di e boda di plata di Reina Beatrix y Principe Claus, esaki a ser celebra cu plantamento di un Huliba. E plantamento aki a ser haci pa Gobernador Felipe Tromp y Prome Ministro Nelson Oduber.

Esaki tabata tambe e corona riba e trabao di un comision chikito bao guia di Richard Vingal, kende den e ultimo simannan a traha pa renova e parke aki cu pa hopi aña bay den decadencia.

Trabao grandi tabata e drechamento di e estatua di marmer di Wilhelmina, cual dia 22 di October 1955 a ser devela pa Princesa Juliana. E empresa Marmi Aruba a percursa pa restauracion di e obra di e artista Italiano A. Luadi di 36 aña pasa.

Ora cu a resulta cu e pareha real no tabata desea un collect pa e fiesta di boda di plata, pero si a haci un peticion pa tene accion pa e medioambiente, a dicidi di dedica atencion na plantamento di arbol y yerba y mantencion di parquen. E presidente di OVA a haci e peticion na Prome Ministro Nelson Oduber pa tene



un accion na Aruba tambe y dirigi esaki riba Wilhelminapark cu pa basta tempo a ser negligish.

Algun dia despues mesora un comision a ser forma y cual cu ayudo di hopi hende esaki a cuminsa opera.

Presidente di OVA, kende ta Jos van der Schoot, a gradici pa e plantamento di Huliba na tur esnan cu a yuda of colabora cu e proyecto aki pa cual Aruba un biahha mas por dispone di un bunita parque.

El a gradici e miembronan di e comision, gobierno, Interbeton y HarbourTown, Marmi Aruba, y Mercurius Trading pa e bunita borchin na e entrada.

Muy en particular gradecimento mester bay pa Direccion di

Obras Publicas kendenan a haci hopi trabao. No menos cu cuarenta (40) pick-up yen-yen cu sushi y desperdicianan a ser saca for di e parque. Akiden mes Gobernador y Prome Ministro a planta e arbol y a expresa e speranza cu esaki lo por crece rapido. No ta conoci si a haci uso di "Miracle Grow".

Presidente di OVA a haci un peticion na Gobernador pa el pone e pareha real na altura di e

plantamento di arbol aki y a haci un apelacion na e publico pa yuda mantene e parque limpi.

Ainda tin hende cu ta pensa otro! Na final di trabaonan di limpieza di Marmi Aruba, un hende desconoci a rasca e marmer atrobe.

Na final di plantamento di mata, esnan presente entre cual tambe presidente di staten Felix Flanegin, director di kabinet mr. B. Nieuwenhuizen y ayudante di Gobernador, capitan Quant a pone nan mes na altura di e trabaonan. Gobernador y Prome Ministro Nelson Oduber tabata acompaña pa nan distinguida esposa.